

N pas inant per nosc lengaz

Aproà te Consei provinzièl n emendament portà dant dal conseier Giuseppe Detomas per poder durèr l ladin ence ti ofizies fora del teritorie

Mendranzes - Da semper una de la mesures per recognoscer l valor de n lengaz l'è la possibilità de l durèr ti raporc anter privat e aministrazion publica.

Ti egn i ladins de la provinzia de Trent à arjont l derit de durèr sie lengaz ti raporc con i ofizies di enc publices e ti istituc che sporc servijes publices. Purampò chest derit l'ha n limit: defat, chesta previjion podea esser metuda en दौरa demò ti ofizies con senta tel raion ladin de la provinzia de Trent e no te la strutures che opera o fèsc funziions strentes col teritorie en costion, ma che é lochèdes fora de val.

Per chel che vèrda la facultà de durèr l lengaz ladin te la relaziions anter privat e aministrazion publica enscin ades l'era na desvalivanza de deric, defat ai sentadins fasegn ge vegnia recognosciù l derit de rejonèr te sie lengaz te la comunicaziions a ousc e de l scriver te la corespondenza canche i aea da se oujer ai ofizies con senta tel raion ladin, ma l medemo derit no era pervedù per i raporc con i ofizies de la Provinzia che laora o à a che fèr coi ladins, enceben che i abie sia senta fora dal teritorie ladin. La



L'aula del Consei provinzièl a Trent.

norma defat no aea valuta per i ofizies fora da Fascia, enceben che i aesse abù competenza per l teritorie ladin, descheche sozet per tropes servijes e ofizies a Ciavaleis e Trent.

Per chesta rejon enstadi l conseier ladin de la UAL Giuseppe Detomas à portà dant n emendament per tor demez chesta limitazion, mudan

proprio chel prinzip che limitea al teritorie de Fascia l derit de durèr l ladin ti raporc con l aministrazion publica.

Da ades inant due i bandi de concors de la Provinzia cognarà perveder, desche titol de ejam, la cognoscenza del lengaz ladin. La valutazion del titol comporta l'azetazion de l'assegnazion

de n post o l trasferiment ence tel teritorie ladin aldò del criterie de mobilità opura te strutures con sentes vejines che fèsc funziions te l'interress de la popolazion ladin. L'encèria de individuèr i ofizies a chi che pel vegnir aplicà chesta desposizion sarà de la Jonta provinzièla adum col Comun general de Fascia. L'emendament portà dant dal conseier Detomas é stat aproà con 25 stimes a favor e 2 astegnui.

La vulnerabilità tel Trentin

En calità de president de la Quarta Comiscion Permanenta, Giuseppe Detomas à proponet ence n orden del di che revèrda l'enscida en cont de la vulnerabilità sozièla del Trentin, che é stat sotescrit da etres 18 conseieres de maoranza e de mendranza.

L'è stat apontin portà dant n lurier de enrescida emportant che à ocupà la Quarta Comiscion e che ge dèsc ousc, te la relazion aproèda da la medema Comiscion, a la segnalaziions e ai consees di tecnies de chest ambit che é stac consultè. L'orden del di porta dant n aprofondiment sul fenomen

de la vulnerabilità sozièla e su l'emportanza de individuèr la categories più a risech per schivèr n svilup de la situaziions de dejèje e de meseria. Per "vulnerabilità sozièla" se enten defat chela condiziions olache mencia i mesi, la relaziions o i leames de solidarietà che deida a fèr front a situaziions de dificolità che podessa vegnir de dò cà da n mont a l'auter, na condizion che met ensema fatores desferenc de natura economica, sozièla, etica, culturèla, politica e teritorièla, e che donca domana de ge fèr front a na vida multidisciplinara e con respostes articolèdes.

Con chest orden del di, che é stat aproà a l'unanimità, l'è stat empegnà la Jonta a mantegnir n control costant e ascort su la vulnerabilità sozièla, al fin de projetèr mesures de intervent semper più percacentes e efizientes. Con chesta, se à ativa ence n focus su la relaziions interpersonèles, con chela de pontèr via con canai de comunicazion anter la istituziions e i operadores del setor per esser bogn, tel besegn, de ge fèr front en prescia a la problematiches e i entrighes che podessa levèr.